

勉行堂文集



08084

勉行堂文集卷五

讀易舉要跋

古歛

程晉芳

魚門

俞氏琰讀易舉要四卷見文淵閣書目及焦氏經籍志朱睦㮮授經圖今其書不傳而永樂大典有之亦非完本采掇得四卷其學主象數于反對之義深致意焉又駁張行成以元亨利貞起數于四及田疇積乾坤以下六卦至于師而六軍之數全史瘡謂革居四十九應大衍之數故云天地革而四時成節居六十而甲子周故云天地節而四時成皆以偶合之見窺聖人作易之意殊非本旨是也而琰亦不能不糾纏于象數豈責人則明耶以其元人之書在今爲難得故著錄焉善學者擇取可耳

圖學辨惑跋

晦木先生學有本源于易理尤邃既撰周易象辭十九卷尋門餘論二卷復成茲一卷以辨陳圖南傳授之謬余少時讀李鼎祚易解每竊疑之既乃得黎洲易學象數論爲之豁然心開謂前人不我河漢也然求難弟之書竟不可得乾隆乙未始于浙省所進遺書中見之蓋與胡氏之易圖明辨程氏之易通皆能撥雲霧于晦昧之餘使白日青天昭垂于千古矣近吳郡一二儒生復取漢人飛伏世應之說及宋儒圖象反復研求欲翻漢庭老吏已斷成案不亦難乎經術正而人心正所關于世道者誠不小也

易圖明辨跋

右十卷胡東樵撰辨宋以來圖書之僞卷一河圖洛書卷二五行九宮卷三周易參同契先天太極卷四易數鉤隱圖卷五啟蒙圖書卷六卷七先天古易卷八後天之學卷九卦變卷十象數流弊易圖書之僞自艸廬震川輩皆有疑義而未窮極其故也及黎洲作易學象數論晦木作圖學辨惑而盡抉其要矣余猶惜黎洲既以古圖爲不足徵而又自爲諸象以求合乎作易之原非所謂責人則明責己則昏乎東樵于此旁搜博考極辨難之力而無矜張矯厲之氣可謂精醇之至矣人皆知其禹貢雖指爲第一書不知錐指猶有悞者此則無可議也學者讀二黃胡氏之書又叅以青溪程氏之易學三種考之折中觀彖等書出于叢棘撥盡雲霾而易之能事畢矣

易漢學跋

易漢學八卷近人惠氏棟定字所輯首孟長卿易二卷次虞仲翔易一卷次京君明易二卷次鄭康成易一卷次荀慈明易一卷次河圖洛書先後天兩儀圖象太極圖辨重卦說卦辨共一卷中卷兼載一行歷經及火珠林推衍法觀其次序似非手訂之書所蒐輯亦未極賅備而虞氏逸象尤適用其他則但資博雅而已余嘗謂詩書三禮三傳漢儒注釋多勝後人至易學則宋明以來較勝于漢人嘗著論序辨之噫學者苟不入其室焉得操予以伐耶李延平朱子皆深于內典而其闢二氏之學最精則學易者又不可不知漢人塗徑也

周易述跋

右長洲惠棟定宇著專注漢學既自爲注復以古注叅之自上  
下經至雜卦傳凡二十一卷第二十二二十三卷曰易微言皆  
取古書之有關於陰陽理道者自卷二十四至三十爲易大義  
易例易法易正訛皆未刻意其家當有之惜未及見也近者漢  
學之盛倡于定宇謂易有五家漢魏晉唐宋惟漢易用師法得  
其傳不知輔嗣微言不同于解老凡定宇所尸祝者皆輔嗣既  
撥之雲霧也輔嗣開其先宋賢繼其後又得家綿莊易學三書  
叅之以安溪諸人而易道大備矣然此采輯頗博足資搜討如  
以易之正則在是焉則入于幽谷不復出矣

尚書通議跋

尚書通議二十八卷通議補二卷家綿莊先生著專主今文一篇爲一卷前列白文次乃論說其疑無君丹朱傲一節鄙見適同又論治水先後于九州之次第見之可謂一語破的矣又論禹貢非專爲貢獻而名辨四海之所包者廣洪範議曰在天者莫大乎五行在君者莫大乎五事在朝廷者莫大乎八政五紀皇極三德稽疑生萬民者莫大乎庶徵福極又辨周公未嘗誅管叔于康誥紹聞衣德言謂爲千古聖學之綱領卽虞書之所謂稽古也又謂成王于周公禮在不臣家人之禮存焉而于立政一篇常伯常任準人諸官辨之尤晰且確十二州九州因革之故亦頗詳盡通議補中謂多方作而周人始爲政於天下故繼之以立政又謂翼室非居憂之所初喪權居于此至七日而居于先王之殯宮皆所謂讀書見其大者近人罕有其匹也惟以洞庭爲九江此余所未敢從耳余壬午赴京師先生手此以畀余余畧檢一徧越十一年治尚書始詳讀之爲識其要于末云

尚書釋天跋

此吾友盛秦川所撰也凡爲書六卷專釋堯命羲和及洪範數則取古今成說而折衷之吾友戴東原精于推步儀象嘗取是書觀之再三嘆爲精到不可易六經之書易之體段最精書之體段最大天文輿地尤典籍中最要者此書與胡氏雖指分道揚鑣矣秦川名百二秀水舉人作令于山東今不復仕教授歷城所謂讀書種子是也前有自序及其外甥朱休承序休承竹垞五世孫也



青溪詩說跋

青溪詩說十五卷家綿莊撰先生之學邃于易既屢著易又爲書詩解詁于詩不專主注疏亦不曲從宋學凡解注者固宜如是其言周南當屬文王不當繫之周公至召南屬召公者地去岐周漸遠服召公之化卽服文王也似有特見靜女一篇謂是思賢而非男女之相慕于檜之羔裘取頰瀆之說以爲檜君好盛服故以其朝服燕而以其朝天子之服朝過矣而非大惡也蓋諱其大惡而以微罪行猶孔子之膳肉也候人正毛傳以候人爲賢者之誤于南陔六詩力辨有聲無詩之誤於至于太原謂是雍之原隰于裳裳者華取朱氏善說以爲講武旣畢天子與諸侯燕之詩于維天之命謂是祭文王之詩序謂告太平義頗迂滯于天作以爲禘祭皆確有所見如是者至多足以垂世矣惟昊天有成命謂是日至南郊所用似猶篤信竇公所獻之文余于先生親炙者深然不敢曲從也

春秋通論跋

春秋通論四卷方苞靈臯撰靈臯既著直解別有通論猶安溪  
旣爲周易觀象又別成周易通論也靈臯與張彞嘆友善彞嘆  
長于春秋故靈臯學得正宗其論桓王伐鄭微近東萊博議氣  
息而義頗可存論魯初于周朝聘不行或使微者行其說甚是  
莊僖頃惠王之崩不書疑是闕文而方謂非闕此則當存叅也  
其于稱人稱名謂初終詳畧之異最確于會盟諸條辨之尤晰  
又謂公子暈等在隱公時不書官非豫貶論吳多殊會因事訖  
實非有別義論齊姜當爲嫡論王臣會盟征伐前書名後稱子  
之故皆確有所據而文筆古勁尤說經家所難近人皆輕視靈  
臯謂其學自宋入手如此等書豈可束而不讀耶惟論諸侯之  
兄弟盟聘帥師非有官者則書兄弟又謂王不稱天是貶辭此

則所未敢憑也余別有春秋答問問一辨之古今說經之家莫  
多于易春秋蓋易本難明隨人置說春秋體例繁多各執一是  
亦未易辨若詩書三禮典制斯存故空腹之人于易春秋不難  
解究之難明者莫如易與春秋也蓋易道甚大而有不易之理  
非通三才之故不足以言易春秋舍例則不足以言執例又不  
可以言有文異而例同者有文同而例異者最難著手然在今  
日則春秋之義大明而易學明而復晦矣由漢人學春秋者體  
例本相亂故近人得以宋學正之漢易則自成一家爲漢學者  
執之以駁晉宋以不狂爲狂故易明而復晦也夫由宋以來七  
百餘年聖賢心學旣已大明諸君矻矻孜孜講貫無已自有其  
可傳者在而近人乃泥形質之漢易以奪宋人之席不已謬乎  
易不明則內無以治人外無以治事何以爲通儒吾願後之學

者治易如望溪夔嘆之治春秋庶乎聖學昭然功在萬世矣

勉行堂集卷五

十

周官新義跋

熙寧經義局三書成于荆公父子之手周官則安石所手裁鐵圍山叢談稱其筆跡如斜風細雨蓋安石手稿也近世如范文正歐陽公墨跡尚有傳者而安石稿無存焉豈以其人可議不復收拾耶周官舊二十二卷此吾友周書滄從永樂大典錄出者得十六卷而地官夏官缺焉末附考工記二卷蓋鄭宗顏輯安石字說爲之其于周官好以字說牽合乃王氏說經通病而發明大義自有不可泯滅者余與書滄孔莊谷各鈔一本嗣是永清令周篋谷屬鈔一本而陳上舍竹厂又鈔焉行于世者有四本亦難得之數也

復古編跋

張謙之復古編以說文正小篆而不以小篆改隸書小篆之不可通于隸者則曰隸作某字樓攻媿序稱其嘗篆楊龜山踵息菴以小篆無菴字竟作隸體書之又記其爲林攄母撰墓碑書魏字作魏終不肯去山字陳振孫所記亦同然考此書魏字下注曰今人省魏爲魏國之魏不指爲俗體別字是意在復古而不戾于今可尚也前明黎民表嘗刊之余從江丈松泉家借鈔凡六卷庚寅八月下浣去邗江之前五日書

唐六典跋

唐六典外間有刊本然麻沙特甚此余家所藏鈔本諱字尚少其經進歲月與撰著之人竹垞老人言之悉矣竊謂讀是書者宜與杜氏通典及新舊唐書並勘則書之佳處自見如叙官自唐虞以下取以證李唐之制與通典同者十之七八而太尉一條注內所引春秋金成圖及運斗杓則非通典所有而銓注擬則亦通典新舊唐書所未備也叙階及三衛攷不獨杜劉歐之書未核卽唐會要中亦有藉此補缺者戶部郎中下職事載至數萬言且作周官禹貢體例載經歷山川與夫物產此六典之異于他書者也禮部郎中下大瑞中瑞小瑞亦各書所未有至若宮殿之名中使書直之目分四部書之條例皆他書所未見古書必如是而後爲不負虛名耳惟御史臺一門稍恨其畧不及杜氏諸書之贍而謚法一條會要尤詳然則唐人之書通典而外此與會要如蛩駘之相須不可闕一矣

開元占經跋

開元占經一百二十卷晁陳著錄未之載也新唐書藝文志作一百十卷豈誤以二十爲十耶前有明萬歷丁巳小引云兄明哲施爲其弟序者究不知爲何人名字亦疑有誤其書爲唐瞿唐悉達所撰自天體渾象迄龍魚蟲蛇占所引諸書皆唐以後無傳本者其所引星經較之津逮秘書所刊蓋多大半巫咸經各史天文志及文獻通考間一引之不及是書十之三、四諸星相去度數推步最詳二十八宿三垣各宿名號有與今不同者如東西咸太陽守八魁之類又如句陳謂之常陳南北河謂之南北河成皆足資攷證雖凡數占驗之書不盡可據而此書來歷最古宜爲罕見之珍也

唐律疏義跋

仲尼之門五尺童子羞稱五霸今之儒者述三代以後令辟動輒曰漢文帝唐太宗不亦陋乎然文帝懃德猶小唐太宗之失行則非士君子所忍道矣要其措天下于治安歷祚三百年之久則以親見隋氏之驚刻而力矯之于刑律一秉經術得寧寬毋濫之旨蓋自秦迄隋殘人以逞法務刻深至唐而一變宋元兩代幸遵唐制讀義疏一書與刑統賦質證可以知之矣余求其書二十年不可得最後始于四庫館見之讀之月餘而後知天心之祚唐非無故也若其刊刻次第及卷軸之多寡則小長盧朱氏言之悉矣



元和姓纂跋

唐會要謂元和姓纂爲王涯撰上蓋以涯曾爲序而不知其爲林寶撰也寶濟南人名見藝文志及各家著錄鄭氏通志則以爲李林寶蓋當時李吉甫以書命寶二名連書傳寫脫去吉甫字耳其所據多舊書姓譜中宜爲最古惜書成纔得二百日而矜尚門第倉卒間就各家譜牒編此成篇訛雜難信處正不少也是書至宋時已頗佚脫故陳振孫謂絕無善本大典分載于千家姓之下顛倒錯亂非復原書體製今以廣韻四韻編之又取宋卿名世辨證所引各條補焉仍得十卷原序稱皇族之外各以四韻聲類編集則李姓居首無疑此亦不能如舊矣

元和郡縣圖志跋

元和郡縣圖志四十卷缺第十九二十二二十三二十四三十五三十六凡六卷今永樂大典中亦無之蓋書缺久矣地理專書水經詳于說水而不能遍及郡縣自各史志書而外唐初則有魏王泰括地志其後乃有是書爲地書鼻祖其佳處有二焉一則每郡縣下備列四至此地學之要後來所宗一則古蹟所引不多唯取以證地所在其體簡括固其所長但地志亦有不容太簡者耳今以各志及通志通攷校之遺漏亦正不免如水經缺滹沱而此足以補之胡朏明所亟取宜矣而雍州下云武帝太初元年改丙史爲京兆尹依三輔決錄諸書丙史上宜有若字又終南山自藍田以至蓋屋總謂之終南而其地至廣唐賢好宗文選遂分終南太乙爲二山不知終南祠太乙有峯曰太乙峯唐人詩句可證也細柳原一條上林賦登龍臺掩細柳郭璞注觀名在昆明池南後漢書郡國志長安有細柳聚此皆不引獨引亞夫屯軍所是簡之病也汴爲春秋鄭國之地徒云鄭地亦未盡確開封漢儀諸縣不載黃河又不可解也今括地志雖不存而散見于史記漢書資治通鑑注太平御覽者尚可得十之五六余恒欲鈔輯爲一編以與此校對恨鹿鹿未暇也

太平寰宇記跋

唐以來輿地專書當以元和郡縣志及此爲第一元和志體例最善惜其闕佚而亦有過簡之病此本載山川古蹟最詳且所引如宋武北征記隋東藩風俗記等書皆世無傳本又所載水道如濟渭諸川必徵引禹貢以相符合詩春秋所引尤多引水經於鎮州真定縣蒲澤下云滹沱河東經常山城北又東南爲滹澤又滋水下滋水又東至新縣注滹沱河此皆今水經注本所無而誠夫水經注釋不之載何也故沛城漢志及史記各注俱未詳是書載在沛縣東南微山下蔡蒙諸山元和志不載是書于始陽縣下云始陽山在盧山縣東七十里本名蒙山唐天寶中始改名始陽縣此更足備考訂載泗水出磬云泗水無磬石其山泗水南四十里今取磬石上使擊之其聲清越或禹治水時泗水卽至此山此註疏所未備也各州風俗之下歷叙州之大姓得左傳祝鮀述古之義地之四至及風俗人物土產各門皆此書爲之例竹垞乃謂不及歐陽之輿地廣記得毋未之深考耶

元豐九域志跋

右元豐九域志十卷其撰書之始末詳見竹垞題跋宋代輿地之書各有命意如太平寰宇記則專載宋初沿革輿地廣記則專載神宗時沿革元史則專載宗和時沿革合三書考之府州軍監每相符合故知地學之難也此書所載沿革則自宋初迄元豐時可補證諸書之缺誤至其各縣下載及山川古蹟寥寥數語則本隋書及元和郡縣志新唐書地理志體例不可輕議也太平寰宇記亦載地之四至而不及此書之詳宋代鎮砦及銅鐵監之制此視宋史爲核五代沿革亦薛歐二史所不及土貢亦多于通攷宋史篇惟羈縻州所載視他書恨畧耳吳志伊博極羣書撰十國春秋地理表而于揚吳之地理沿革撫州節度之廢置不及詳載豈未詳閱此書耶曲洧舊聞謂九域志終未修成王伯厚爲宋末人著詩地理攷多引其言則是書在南宋時固爲成書也惟伯厚地理攷內引九域志甘棠樹之類今本無之似非宋代原本矣

輿地廣記跋

此丁酉秋同年孔莊谷爲余鈔者吾友嚴冬友曾有是書余欲借鈔而未得經七年後始得之此書自竹垞稱之重于世久矣及詳觀之乃知不及樂氏寰宇記遠甚蓋皆撮鈔各史地理志及文獻通攷諸書往往一字不增損如九州之分爲各州歷朝之分併州郡皆人所共知諸書所悉有與其卽後人之書求之不若據前人之書讀之也其叙五代州郡本之歐史之職方考而于歐之脫畧茂延諸州未之及五代沿唐之制分爲十道薛史頗詳而此書未詳是旣不能補歐史之缺又不克用薛史之長疏忽甚矣其各府沿革則刪節通典而爲之又好引古蹟而多所脫畧如陳留本鄭邑後又爲陳所併故曰陳留通典諸書皆載而此不載又新安縣載函谷關廢置而大嶠關金關不一

及焉余故謂凡讀各種史書者必多求他本對勘則得失立見不可震于其名從人之好惡也惟書中載水利較他書頗詳唐書地理志之後此爲第一可取者在此而竹垞轉不之及何歟

方輿勝覽跋

宋祝穆和父方輿勝覽七十卷余舊從王光祿蠡塘處購得之既而以贈申副憲拂珊此本從耳山同年處借得者其書多載南宋沿革分併事視北宋諸家地志又一局不可少也而于識小之功尤多古地志惟載山川形勝風俗物產間舉古蹟以證地之所在耳非誇多鬪靡資文苑之用也此則亭臺橋市佛寺道觀名宦人物詩文悉載之開後來志家小派究非正則且古地理書所載勝蹟皆古事此則並當時勝蹟亦載焉尤爲元明以降所祖惟殿閣名目有宋史所未及載詩文亦足補宋人文集所未備唐盧元輔胥山初終文粹亦未之及而沿革分併終恨其畧余嘗謂地理宜分識大識小二種各自爲書一則便于按冊而稽熟知天下形勢與其土風物產一則以資詞人學士歌詠文字之用若此者其亦識小之流而雜以大事體例毋乃混歟

地理攷原跋

江西熊君心泰著地理攷原一卷首言楊廖二公九星陰陽及九星九變次破形家之誤次言水歸東海次言乾坤退居次言三合五行次言金生水次言六土次言二土長生次言土旺次言五運六氣次言支壠淺深次言文曲破軍凡十三則古者族葬多在西北蓋北方高躁土厚水深不煩遠擇也堪輿之說蓋以東南地下多水而風臨之蟬蟻生焉爲人子者必欲以親體而求富貴罪之大者矣而詳視水蟻以安其親則固不可已也故論風水當以朱子爲斷而葬法則郭景純之葬經如經書之有學庸是一切書頭腦觀能君斯言不倍于景純而又有以發明之可謂正則矣近有爲流創三元之說謂葬不可久視三元而遽遷可也嗚呼親膚旒掩非蟻非水而以禍福之故輕爲改易有不遭陰譴者乎創爲此說者其人旣不良死而舉世猶奉其言如圭璧焉富貴重而仁孝輕可慨也夫

大金國志跋

宇文懋昭大金國志四十卷晁陳著錄未之及也惟錢氏讀書  
敏求記有之其編帝紀載君臣事實皆金史所無又前後聯貫  
知非僞撰而各傳則與金史無異豈真僞相半後人有攔入者  
耶末附 許氏奉使行雜鈔與輿地書頗符合而山川風土皆  
後人所未備竹垞謂許氏書不可得不知其卽附于此也他如  
馬四使金國書宋史及續資治通鑑皆不載試舉人于 乃金  
設科舉之始金選舉志亦未載屯田軍制

兵志所不載大定中詔造總計錄乃政之大者而金史諸志  
不載服色各門又金史儀衛志所缺雜色儀制亦金史禮志所  
無此足補史志之缺也章宗以下所載事實與正史無一同者  
亦足以備考正金哀宗一稱義宗于此本見之竹垞謂哀宗一

勉行彙集卷五

三

名義宗可據此以正其誤矣楚國張邦昌錄足與邦昌事畧相  
出入齊國劉豫錄視學海類編所載劉豫事蹟爲詳汴京制度  
宋史地理志亦無此詳也近得王氏汝南遺事比對蓋知是書  
之佳且有多于遺事者其完善卽不及契丹國志要之足寶貴  
矣



歸潛志跋

今外間所行歸潛志鈔本止八卷此余從四庫館鈔出者得十四卷與錢氏敏求記卷數合蓋完書也此書佳處不專載詞人事蹟如郭阿里諸人曾爲將帥奉御之官可補百官志改鈔名色可補食貨志南渡後需用吏吏權大盛可補選舉志完顏氏之能詩者獨多可補中州集而南渡後諸將習氣與夫用武調遣之弊近侍官權勢與宰相埒皆金所以必亡之故正史未之及焉必有資于是矣十卷以後惓惓故國禾黍之思黯然十一卷錄大梁事尤三致意焉吳自牧輩不得擅美于前矣

契丹國志跋

右契丹國志二十七卷宋淳熙七年秘書丞葉隆禮表進前有世系圖晉獻契丹全燕圖契丹地理圖帝紀十二卷傳十七卷自二十卷至二十七卷皆雜記晉宋往來儀事及本國諸國風土歲時遼別史今存者少此最足供攷校如歐公五代史附錄自註謂契丹年號諸家所記外謬不一唯據遼太宗立晉高祖冊文稱天顯九年爲證攷志實在天顯十年十一月足以正歐史之譌也卷二附載記異錄遼主德光得異夢占之云當爲中國立天王司馬氏攷異亦未之及遼史有大同元年卽會同十一年此書無大同元年而有會同十一年其十一年下有注甚詳校對各史皆合是又足證遼史之誤不知當時何故有大同二字豈命名而未用耶辛楣學士曾作文辨之尚未引及此書也建官制度門中所載如敞史木古思努都努古徒努皆遼史百官志所不載衣服如義欄紫鞞鞞亦儀衛志所遺錢氏敏求記但舉其用意之大端而其可采者未之及趙志忠之陰山雜錄今不可得則此書宜可貴矣至元嘉禾志云隆禮號漁林嘉興人蓋失其字矣又謂是淳祐七年進士官建康府西廳通判改國子監簿按淳熙乃孝宗之十二年甲午第三改元年號七年則爲庚子孝宗之十八年也淳祐乃理宗之十七年辛丑第五改元年號七年則爲丁未理宗之二十三年上距淳熙七年且六十七年烏有淳祐七年進士轉于七十年前獻書者乎或淳熙誤作淳祐然亦無是年成進士卽官秘書丞之理凡此皆有可疑古書于今往往有難解處惜不得多本以證之也

遼史拾遺跋

錢塘厲太鴻館于揚州馬氏之小玲瓏山館博覽所藏書既成宋詩紀事復輯遼史拾遺其體例大率仿裴松之三國志紀志所補頗多表傳及國語解亦并及焉中如劉守光盧文進諸人旣采資治通鑑而不及歐五代史所引薛居正五代史則皆通鑑所有非從本書錄出也地志西京諸道宋以後志書可考眾矣而所載寥寥今杭人議此書請精而不博究亦難免疏脫也又金石文字所載極少卷中選舉經籍二志及世表游幸屬國表各注括拾頗詳足備一朝文獻也其書不分卷數第五卷至二十八卷皆無所補綴疑亦有闕耶

遼史拾遺跋  
錢塘厲太鴻館于揚州馬氏之小玲瓏山館博覽所藏書既成宋詩紀事復輯遼史拾遺其體例大率仿裴松之三國志紀志所補頗多表傳及國語解亦并及焉中如劉守光盧文進諸人旣采資治通鑑而不及歐五代史所引薛居正五代史則皆通鑑所有非從本書錄出也地志西京諸道宋以後志書可考眾矣而所載寥寥今杭人議此書請精而不博究亦難免疏脫也又金石文字所載極少卷中選舉經籍二志及世表游幸屬國表各注括拾頗詳足備一朝文獻也其書不分卷數第五卷至二十八卷皆無所補綴疑亦有闕耶

習學記言跋

東南讀書家稱宋人筆記三種最善曰困學紀聞夢溪筆談習學記言以愚論之終以困學紀聞爲第一筆談次之記言又次之蓋筆談紀聞醇正雅飭頗有攷校記言則好立異說陳振孫謂其文刻峭精工而義理未得爲純明正大劉克莊爲趙虛齋作莊子注序稱其講學析理多異先儒蓋其佳處在異病處亦在異也如繫辭檀弓每遭詆毀論語孟子復有疑焉非僻說狂辭得罪聖賢者耶然其論國語非左氏攷子思生卒年月斥漢人言洪範五行災異之非皆確有所見文備唐史發揮宋史亦有卓識未可輕議也三書而外復有孫奕謨兒編洪容齋五筆差足肩隨若能改齋漫錄猗覺寮雜記攷證雖精局面愈狹矣是編五十卷吳下鈔本譌字尚多爲校正訖乾隆甲午六月也

四明文獻集跋

伯厚深寧集一百卷世久不傳此本蓋浙人所蒐輯成者得百七十餘篇制誥居十之七集前有小引載同郡鄭真輯陳朝輔補遺宋史謂度宗卽位應麟章百官表循舊制請聽政四表已上一夕入臨宰臣諭旨增損三表則此七表者已先進前四表次進後三表也考之是集則第一表至第二表乃景定五年十月上第三表至第七表乃十一月上本傳不同又宋史載買似道罷都督予祠在德祐元年二月徙居婺州又徙建寧俱在七月而由揚州責歸紹興實是在年五月四日見于是集責罷似道制亦可備史家缺矣

明儒學案跋

右黃梨洲先生所編曰河東學案曰三原學案曰崇仁學案曰白沙學案曰姚江學案曰浙中相傳學案曰江右相傳學案曰南中相傳學案曰楚中相傳學案曰北方相傳學案曰粵閩相傳學案曰上修學案曰泰州學案曰甘泉學案曰諸儒學案曰東林學案曰蕺山學案目凡六十二卷梨洲承學于念臺念臺之學本陸王而加正焉觀其識高子遺書爲有禪語然蕺山語錄如湛然寂靜中當見諸緣就攝諸事就理又曰正諦當時切忌又起爐竈此非釋語而何故余謂明儒學無流弊自以河東爲第一若白沙陽明固是打成一片謂之爲禪不可謂之爲儒亦未可也梨洲默主陽明而于陽明說不去處每加釐正將所謂天理日在人心耶讀此篇亦可知明代二百七十年中正賴醇儒扶翼治教 行 可 後賢 空言隨和之人又從而靡焉遂使講學之風爲世口實不知明之亡由其君不親政事士大夫以勢利侵鄉黨柄政者不恤民隱驕佚之氣召禍亂非盡講學之過也今士大夫一語及講學則譁然謂之曰人第以躬行爲尚耳矣講之有其言躩矣及退而察其所爲無一事可質之幽獨者此又一流弊也魏晉之餘禮法蕩然而士夫猶有持清議者孰則起而振之使樸可返而淳可還歟

嶺西水陸兵紀跋

右秀水盛萬年恭伯著恭伯萬歷癸未進士由刑部主事屢官廣東貴州江西按察使遷南布政使未任卒明詩綜載其有拙政編而未及是書此其分官嶺西道布置兵事所作也其裔孫百二爲刊焉凡上下二卷拙政編附刻于後兵紀有喻政序拙政編有朱大啟序譚瑄序及恭伯自序末有漁鼓曲一卷則桐鄉顏鼎受孝嘉撰孝嘉國初人與竹垞交竹垞贈詩所謂才大最能詩也詞曲雖近俚殊有風味如芒鞋云直走到山窮水盡才見得海濶天空可以知其胸次矣

南堂詩鈔跋

此桐城方貞觀南堂先生詩也初刊于淮安余族伯父水南先生其姻也爲之葺刻再刊于儀徵汪氏此則方制軍所刊先生與息翁爲再從兄弟皆長于詩而嗜好趨尚不同先生專主中晚唐以清新宕逸爲主及留滯京師懷歸念遠每有所作一時傳誦殆遍乾隆丙辰舉鴻博辭不就作詩四首以謝載在集中此本所選頗嚴慎然汪氏本中有先生晚年所作初秋晚坐一首未入選余尚記之曰輕雲如縠掩殘暉向晚涼風動葛衣木葉漸凋霜未降社錢纔斂燕初歸苦空禪早聞三昧隱見星休問少微久已無心事書卷流螢還入破窗飛可以知其風槩矣余弟述先尤好其詩至今仿之先生嘗欲選唐人自劉長卿以下至中唐之末爲一集去昌黎長吉盧仝劉叉四家而以義山牧之飛卿致堯續焉以教世之學詩者余謂此教初學以正其體使上溯漢魏六朝下逮宋元以降可也若專事乎此恐被唐人縛住然足以救世之才力不足而妄托大家終其身不能條達者也先生生于康熙己未少息翁四歲嘗屬余推命余曰六十九歲有重疾是年竟卒余之詩蓋出于桐城兩方兼採其說而學焉撫此卷不無今昔之感云



春及草堂詩鈔跋

右詩自一集至四集凡四卷桐城方扶南息翁著其從兄子直隸總督觀承選輯息翁之尊人御生爲余祖姑夫以故息翁與先君子爲中表兄弟嘗止余家余從而學詩其議論專主唐宋大家而于杜蘇尤嗜焉其初名世舉師事竹垞老人曝書亭集中有兩集平山送查編修嗣琛蔡舍人望方上舍世舉唐明府紹楨入都二十韻世舉卽息翁後以望溪事入旗籍南歸後乃以字行別號息翁息翁生於康熙乙卯在都中以詩文馳譽所交接皆名輩迨乾隆丙辰丁巳間已六十許人每娓娓談舊事不倦余嘗叩其卷中感舊詩本事多不明恐日久無爲注釋者先生爲余舉二三首始末又不悉言今先生已下世二十餘年舊事不可復得矣其江北懷古詩三十首尤名于時庚寅歲余作江南懷古詩三十首蓋以擬先生然清薄且平不迨遠矣先生別著昌黎詩集注行于世未刻時嘗欲以此售于余仿徐淑士春秋地名攷畧例余笑曰生平一字不假借人豈肯爲郭象宋齊邱耶先生大笑曰外家得此人足以張吾軍矣異日聲名在老夫上也先生所居春及草堂晚得三子屢見詩集中歿後諸子皆淪落不壽今遺孫無幾漸不得消息悲夫

勉行堂文集卷六

古欵 程晉芳 魚門

文木先生傳

先生姓吳氏諱敬梓字敏軒一字文木全椒人世望族科第仕宦多顯者先生生而穎異讀書才過目輒能背誦稍長補學官弟子員襲父祖業有二萬餘金素不習治生性復豪上遇貧卽施偕文士輩往還飲酒歌呼窮日夜不數年而產盡矣安嶽巡撫趙公國麟聞其名招之試才之以博學鴻詞薦竟不起

廷試亦自此不應鄉舉而家益以貧乃移居江城東之大中橋環堵蕭然擁故書數十冊日夕自娛窘極則以書易米或冬曰苦寒無酒食邀同好汪京門樊聖 輩五六人乘月出城南門繞城堞行數十里歌吟嘯呼相與應和逮明入水西門各大笑

勉行堂叢書六

一

散去夜夜如是謂之暖足余族伯祖麗山先生與有姻連時周之方秋霖潦三四日族祖告諸子曰比日城中米奇貴不知敏軒作何狀可持米三斗錢二千往視之至則不食二日矣然先生得錢則飲酒歌嘏未嘗爲來日計其學尤精文選詩賦援筆立成夙構者莫之爲勝辛酉壬戌間延至余家與研詩賦相贈答愜意無間而性不耐久客不數月別去生平見才士汲引如不及獨嫉時文士如讎其尤工者則尤嫉之余恒以爲過然莫之能禁緣此所遇益窮與余族祖綿莊爲至契綿莊好治經先生晚年亦好治經曰此人生立命處也歲甲戌與余遇于揚州知余益貧執余手以泣曰子亦到我地位此境不易處也奈何余返淮將解纜先生登船言別指新月謂余曰與子別後會不可期卽景悵悵欲構句相贈而澀于思當俟異日耳時十月七

日也又七日而先生歿矣先數日哀囊中餘錢召友朋酣飲醉輒誦樊川人生祇合揚州死之句而竟如所言異哉先是先生子煇已官內閣中書舍人其同年王又曾轍原適客揚告轉運使盧公殮而歸其殯于江寧蓋享年五十有四所著有文木山房集詩說若干卷又仿唐人小說爲儒林外史五十卷窮極文士情態人爭傳寫之子三人長卽煇也今官寧武府同知論曰余生平交友莫貧于敏軒抵淮訪余檢其橐筆硯都無余曰此吾輩所倚以生可暫離耶敏軒笑曰吾胸中自具筆墨不煩是也其流風餘韻足以掩映一時室其躬傳其學天之于敏軒儻意別有在未可以流俗好尚測之也

晚甘先生傳

先生姓程氏名茂字蓴江先世新安人系籍淮安之安東先生生而岐嶷好讀書九經百家諸史漢唐宋以來詩文名集窮覽鉤貫曲得其條序抉髓而淪其精家故素封然多好文學者叔父爽林先生爲名孝廉叔父水南先生文章聲譽播海內有圍在淮之珠湖爲前明張氏曲江樓故址構而新之名曰柳衣延致江浙耆儒方文翰蔣東委徐笠山王雲衢罕皆篤林及淮之周白民邱庸謹劉萬資兄弟相與晨夕淬厲文讌爲一時之盛于時曲江樓課藝名天下先生以從子廁諸叔父間外內師友目染神會學益以進補安東博士弟子員貢入太學桐城方望溪先生于文章不妄許可獨袖先生文至朝堂示僚友曰此程蓴江文也吾無間然矣北平鍾勵暇篤學踐行嚴於取友獨心

鮑行堂集卷一

三

折先生曰蓴江古人也遂爲其子聘先生女先生旣屢躡場屋慨然思歸築園曲江樓之南曰晚甘園日種樹課書其中海內文士泊船淮陰城外必過訪先生折衷論辯上下今古窮日夜勿倦而家道益折閱先生夷然自得不顧也其學于古文最深詩縱橫排與得杜韓之遺其遇人無貴賤疏近皆粹然以和示以詩文朗誦數過悉得其所自出而稱道之使人心饜及自所著作則脫去畦徑戛戛獨造淺人不能識也性醇摯篤友愛兄弟皆白首怡怡如童幼時其視友朋若性命急人之難如恐不及口未嘗臧否人物而區別賢否若鏡之著焉精鑒賞嗜書畫尤好遊覽遇山水勝處留連沉吟終日不去時人比之陶峴倪高士年六十有九卒著吟暉樓遺文三卷晚甘園詩六卷曲江

樓制藝 卷藏于家



嚴海珊小傳

海珊乾隆間詩人也康熙庚子舉于鄉雍正甲辰九月會試不第越七日由

恩榜中式有句云彭衙分拜三年賜絳縣爭傳七日蘇一時都下傳誦遍君益奮于詩從而游者皆效其格律然君之得于天分者人莫能及也余嘗獲觀其詩鈔及明史雜詠又見其嗣君名裘所撰行畧作而歎曰人之傳不傳有命其傳之大小久暫亦有命或此事傳而他事弗傳何莫非命也君之作令于山西直隸也先後歷六七任又爲雲南之嵩明州調鎮雄州以事罷復以知縣就補雲南而卒其在臨汾開免坡險道創立鳳山書院其在長垣拯河患救民饑修堤築支河民至今賴以無患若乃決疑獄應軍興政績固隨在而有然無人薦揚之余未敢決

其必傳也獨聲律一道直入三唐之室同輩中自錢唐厲樊榭而外弗多讓也而尤長于七言律詩雖樊榭亦自謂弗及蓋三十年中沉淪仕宦其精神所淬厲者何限而獨以詩鳴絕幽擢新爲世所折服豈非蒞民之事非能由己以屈伸而詩歌吐屬則信已學力所到操縱自如卒成其爲一家之學其傳之久而愈光有斷然者然君之詩傳而志亦弗隱矣君諱遂成字崧瞻海珊其別號浙之烏程人所著有詩經序傳輯疑二卷詩鈔十卷補遺二卷明史詠四卷未刻詩文六卷乾隆丙辰嘗舉博學鴻詞科丁外艱不試竟終外吏命也君有五子長名裘亦能文今爲燕平書院山長

四死事傳

王日杏字丹宸號漱田無錫人祖雲錦康熙丙戌  
廷試進士第一改翰林院修撰提督陝西學政父諱興洛君幼  
時讀書上口卽倍誦旣長善書法于魏晉以降墨跡石刻無不  
臨摹輒畢肖又嫻習時藝慨然有用世志乾隆癸酉舉于鄉甲  
戌考取內閣中書行走軍機處每

扈從行圍遇公事旁午坐馬上盤一膝置紙膝上信筆作小楷  
疾如飛而工秀獨絕同輩中嗟嘆以爲莫能及有官中書者見  
機要大臣踞一足請事君見而怒罵曰子非人壞

朝廷綱紀吾不能與子共事遂告之大學士陳文勤公逐之蓋  
數十年前士大夫以禮自持于君猶見前輩風采云君性耐繁  
劇退食之暇輒以文筆書畫自娛生平未嘗見倦色屢擢戶部

鮑行篁集卷六

六

郎中出知銅仁府明法善斷人稱之曰王青天公事聖誤降調  
抵京時大學士溫公辦理緬甸將往滇南聞君至請與偕行奉  
命再授內閣中書仍辦軍機事由滇之蜀進討金川佐謀畫著  
有勤績木果木之變君方引衆南有紅衣賊立高壘飛片石正  
中君額以死事聞贈授光祿寺少卿蔭子光顯知縣

吳璜字鑑南會稽人父爚文號樸存工詩能文乾隆丙辰舉博  
學鴻詞科試不第于後困頓場屋爲諸侯賓客以老君旣名父  
子又舅氏商太史竇意亦以詩名君聰慧善聽受故幼而能長  
而工遇名流得一字一句諷誦不休或錄而藏之人笑爲詩癖  
勿恤也庚辰成進士授戶部主事貧益甚作詩益勤苦手鈔近  
人詩數十冊猶以爲未足己丑選授澧州未蒞任以憂去壬辰  
復待選來京師詩筆益邁健兼治古文駸駸乎成集矣旣而四

川總督劉秉恬以方用兵攻大金川請簡文員十餘人聽指揮君與同年孫君維龍適與斯選將行債家促迫幾不得發比至蜀入軍需局治糧事番人來攻君與孫君皆歿于陣所輯他人文及自著從軍詩多泯沒惟藏家稿存焉事聞

朝廷贈君按察使司副使廕一子知縣

孫維龍字普田號最堂本浙之餘姚人寄籍宛平乾隆二十五年成進士簡發安徽以知縣用凡一攝潁州府通判授黟縣知縣調知鳳陽縣題署亳州知州計薦一等以公事降調奉

旨仍以知縣用候補四載適金川請能事官佐戎事君銜命暨吳君璜輩十餘人同往其死也在亂軍中不得其真耗君性質直而慷慨勇于爲善然嘗鬱鬱以爲身親民之官而志有不行故遇可以致力者無弗致焉其在黟創立書院延碩士劉君大

勉行堂集卷六

七

槐以教士大槐字廣南桐城人方官黟縣訓導既去而君延之分祿米以贍弟子黟縣東三十里漁亭鎮爲浙楚通衢河之兩岸架木以渡水潦驟溢民以涉爲苦君乃建石橋構山亭冬夏施湯水以濟人人以不困黟之民感風水說年久不葬親或貧不能舉者君爲鬻地勸勉之葬者千有餘家其在鳳陽戊子己丑間遇旱災賑貸君曰是不可以假胥役手夜夜戴星起躬親煮粥散錢弗一毫懈吏畏而民歌之謂孫公活我人或有稱君者愧作色曰君胡然此皆小小不足道也蓋君方欲以其學之所得上焉致之

朝廷下惠及百姓而竟賣志以歿傷哉君無子以旌子永煥嗣

歿時年四十三

趙文哲字損之松江上海人世業儒居于鄉君生有異質讀書



輒數行下窮覽極搜靡不通究所居有田二頃許課似暇卽執卷以吟葢方其少時讀書之樂未有能過者也旣充一官弟子試必冠其曹同時如青浦王昶嘉定王鳴盛曹仁虎官以詩學鳴一時獨于君折服歎遜自謂不及君體貌羸瘦不勝衣而隱然自高遇事不少屈抑閣學李鶴峯視學江蘇尤知君稱爲曠代才比李公移任浙江則延君入幕勘文字君于是徧歷浙東西名勝地幽巖異壑所得必書而詩學益進矣乾隆壬午

天子南巡江浙召試君第一等賜舉人內閣中書丙戌入軍機處行走君旣富文學又精神奕然處劇境無滯難左右禁近臣方重倚毗而君以漏泄禁中語去官時尚書阿公桂將督師滇南幕府闕書記聞君才奏請君暨郎中王昶同行君慨然辭家匹馬短衣從阿公以南由楚之黔之滇之緬甸其山川奇怪皆

勉行堂集卷六

八

昔人目所未經君悉誌以詩侘儻瑰奇生動變化葢進而益上矣旣而阿公由滇之蜀大學士温公方督師勦金川見君與語大悅之乃留幕府贊戎事時方與阿尚書分兵王郎中遂從阿尚書去温公重君甚一飯一飲必與偕片時不見輒令人覘君何作無所苦否已而連尅金川地三十七年十月遂勦平美諾以功復中書又授戶部主事隨營治事三十八年六月蠻人以間誘我軍有爲之應者勢洶洶潰亂在軍者逆知明日蠻卒且大至相率逃竄君毅然以爲身爲幕府贊畫且疊荷

國恩詎可捨帥臣去卒與俱死事聞

朝廷追贈君光祿寺少卿廕一子知縣君死時年四十九前此有璞函詩稿十二卷于役滇蜀又有詩集若干卷藏于家

論曰四君皆才人而與余相知尤深王君之出守銅仁也余卽

寓其所居寒葭潭屋中閱二年札寄曰人言此宅庭中樹高出  
屋主人宜大得意今其時矣孫君待選京師四載日蒔花草作  
詩以自娛余間一過之則買菊盈室兀坐乎其中余執其手笑  
曰子毋謂茲時冷落也異時官職在身思此不得矣鑑南生平  
皆逃債苦吟之境惟庚寅辛卯間教授百泉山差爲平適耳璞  
函則與余爲同歲生官京師共筆硯六載諸君性情舉動歷歷  
如在目前而死爲鬼雄入昭忠祠血食百世不朽之業偏在文  
章之外豈非可悲可異者耶因述其梗概以待史氏採擇云

綿莊先生墓誌銘

余自壬午入都與族祖綿莊先生別嗣是一歲中必書問五六至雖間隔數千里不啻執手覲面之勤也丙戌夏致書去秋冬又連致書竟無所答既乃聞其病甚今年四月忽得正月八日手書字跡端好如平時書中無別語第勸余作歸計耳閱四日族兄德著書來並以先生訃至蓋前書先生絕筆也嗚呼真儒徂謝世所共悲匪余一人族好之深知已之痛也乃不待其孤之請垂涕爲銘以貽先生之弟南耕俾勒諸石曰程氏系出廣平郡在周爲大司馬伯喬休父封于程以國爲氏西晉末元譚公爲新安太守以事罷官卒葬新安是爲新安一世祖其後子孫蕃昌新安遂爲程氏望先生爲宋咸淳宰相謚文清元鳳公十五世孫祖某自新安之槐塘遷金陵父京萼字韋華能詩工

勉行堂文集卷八

十

書迹迹不仕年近六十始娶氏安人舉二子先生其冢嗣也初名默後更名廷祚字啟生別號綿莊生有異質讀書過目輒背誦髫髻時不妄語言好正襟危坐論古今忠孝大節韋華公家極貧恒書屏幅易薪米日閉戶課兩兒俾習洒掃應對之節客來進鷄黍侍立左右如古弟子職凡十三經二十二史懸選諸子百家之書無不讀先生年十五有父執過訪知其才令作古松賦日未移晷得數千餘言乃大驚嘆謂韋華公有子也弟南耕長于史而先生游好在六經韋華公卒免喪偕弟一試而補博士弟子恒自謂文所以輔道自漢唐以來儒生泥典故爲訓詁學而不能變化以隨時其高談性命者又或蹈襲空疏罕裨實用于是以博文約禮爲進德修業之功以克己治人爲格物致知之要天文輿地食貨河渠兵農禮樂之事靡不窮委探

源旁及六通四關之書得其所與吾儒異者而詳辨之蓋自  
初黃梨洲顧亭林兩先生歿後百有餘年大儒統緒幾絕繼之  
者惟先生然久試場屋輒不利雍正十三年舉博學鴻詞科安  
徽巡撫王公鏞以先生應詔乾隆元年至京師有要人慕其名  
欲招致門下屬密友達其意曰主我翰林可得也先生正色拒  
之卒不往亦竟試不用歸江寧時年四十有五自此不應鄉舉  
杜門卻掃以書史自娛南耕有經世才佐大僚幕數十年所得  
脯脩與先生共之無少別異先生乃得專其力益肆志于經書  
自玉輔嗣註易掃圖緯之靈塵追宋元諸儒尊希夷河洛圖書  
互卦變卦卦氣之說雜焉交陳又或拘執爻位陰陽乘承比應  
之體著書愈多易學愈晦先生乃著易通後又成大易釋言三  
十卷晚年又爲彖爻求是說六卷易學于是乎大備始先生少  
時見西河毛氏古文尚書宛詞祖護梅氏書乃爲古文尚書宛  
宛詞以攻之又著晚書訂疑推拓其說別成尚書通議三十卷  
青溪詩說二十卷魯論說四卷春秋識小錄三卷禮說二卷其  
于古今箋疏家鉤貫融會如素所著物取而別其精粗良楛以  
進退位置之領以神悟發前人未發之覆徐而按之于理竅無  
纖悉違也同時方少宗伯望溪鍾員外勵暇皆研究經學于先  
生折服特深有疑義恒相與質證乾隆十六年

上特詔舉經明行修之士先生以江蘇巡撫雅公薦入都復報  
罷歸時年六十有一矣後十年弟南耕老且聾不能遠遊食指  
益繁用是竭蹶先生處之泊如也其狀貌溫粹志清而行醇動  
止必蹈規矩與人居不爲崖岸而自不可犯以家近青溪生平  
出處與劉獻兄弟相類晚年乃自號青溪居士云余之識先生

也當乾隆元年北上過淮執余手孜孜勉以問學自是三十餘年先生遊淮揚必主余家余應試江寧必與先生昕夕聚首其得稍有識知竊附于文人學士之末者皆先生教也嘗恨絕學無傳每成一書必翻覆示余俾定其可否洎衰且病則悉鈔所著書付余謹藏之嗚呼余之顛頓寡植尚能俾先生傳耶然天旣畀先生以絕世之姿又厄以遭逢引伸其歲月使殫思磨精羽經翼傳則所以假手于斯人者非無故也余之力固不足以傳先生先生固自有其可傳者知必不泯沒也所著自羣經而外有詩二十卷文二十卷藏于家生于康熙三十年辛未三月二日卒于乾隆三十二年丁亥三月二十二日享年七十有七娶陶氏無子弟南耕以次孫兆晉爲先生主後某年月日葬于某鄉某里之原銘曰

《笥宴集卷六

十一

挈義撫文與古際也雅揚誥宣弗泯跡也粹乎大醇玉金節也  
阨厥遇以侈其傳窮則彌達也

水南先生墓誌銘

余生平耳目所及北屈燕趙南盡吳越其間讀書嗜古歲數萬金拯士之寒饑學與名日益進家日以落而兀兀不休者在廣陵則爲祁門馬嶰谷半查在天津則爲查蓮坡榕巢于淮則吾家水南先生及先生之從子蕁江皆學人才士所望而歸也先生爲余族伯父蕁江余族兄歲時揖拜論文字往還無少間先生以乾隆九年甲子春下世又十九年而蕁江兄歿此十九年中余與蕁江相得尤深然每談及先生輒相與流涕嗚咽不能止蓋余之爲學賴先生掖以進而其感人之深又有出畛迹外者豈惟余與蕁江私其親族然耶先生歿權厝淮城西之菰蒲曲未有葬期余流滯金臺距甲子之春又二十五載遙念先生厝塋宰木行堪抱矣其文若行慮久且弗傳乃爲文銘寄兄晴

銘行宴與卷一

三

江待先生葬日刻而藏諸幽晴江先生第三子也先生姓程氏始名城後更名嗣立字風衣號水南世爲歛之岑山渡人渡在縣之南鄉曰水南者不忘初也祖必忠公遷于淮籍隸淮之安東父朝徵公有四子其三皆嫡出先生次第四爲庶子少補學官弟子食廩餼歲久貢成均困鄉試者二十年卒不第先生生而愷惻慈仁率踐孝友天資甚異讀書一覽輒記嘗十年不下樓窮究載籍發爲詞章洋溢紆徐人莫能測其所如也事生母朱孺人怡怡愉愉年長授室猶環側作孺子戲以娛母母有弗怡先生若抱重憂母喜笑如常先生動定乃復初孺人歿旣終喪慨然嘆曰筮仕以悅親也吾親弗及見矣奚以進取爲歲丙

辰

朝廷舉博學鴻詞科有薦先生者辭弗就自朝徵公歿伯兄坤

仲兄竣相繼理家事出入謹節度先生獨不問生產見友朋窮  
空若已渴餓貸卹靡少問交日益廣然先生植根于學篤實深  
邃問辨不窮足以折服人士不第爲急難來也淮城西有水鄉  
多蘆葦荷葭乃厚值購之葬母朱孺人其地名之曰菰蒲曲營  
別業其旁日與文士講貫經書屏跡遠俗而生產益耗矣卒之  
前一月尚清健無疾予往候之先生告余曰儒者以治生爲急  
務吾今乃知之雖然浮生如夢耳生吾不知何以生死吾不知  
何以死也蓋先生晚好黃老術悟虛無之旨將築室黃山之巔  
以養氣服食爲事志未齋而卒先生于文章之事無所不能尤  
長于詩長箋累帙不自收拾寫輒散去曰是皆吾之迹不足記  
也善書法好作畫人或求其書則以畫應求畫則以書應求書  
畫詩則與莊坐講毛詩莊子數則其率意不可拘若是自先生  
歿後十年廣陵馬嶰谷卒其弟半查老病鍵戶謝客查氏或死  
或遠仕蕙江兄又歿士人由北之南者順風曳帆靡所止泊益  
淒厲寥落矣先生生于康熙三十七年戊辰十月二十日卒于  
乾隆九年二月 日享年五十有七娶結林方孺人生康熙  
三十六年正月二日歿康熙五十九年五月一日子三祐植純  
側室彭氏子二彤遵女三孫如干人所著水南詩文遺稿如干  
卷又註毛詩業未卒皆藏于家銘曰

來清而去寧不戛戛于治生惟文之克貞士所趨而稱也弗耀  
其英以昌其聲水碧叢叢兮葭亂平是惟孝子莫親之宅兮載  
靈魄以環縈

元漑堂墓誌銘

余兄旣歿之次年歲在己丑余請假南歸以十二月抵揚州兄猶未克葬也入門一慟舉室哀號高堂漸傾塵礫填積寡婦孤兒啼饑忍凍嗚呼傷哉曾幾何時而遂至于是乃亟命諸後子竭蹶治窆窆卽于是月二十八日葬儀徵縣城北尚家墩之原旣蒞事泚筆以存其概兄姓程氏諱志銓字元衡別號漑堂世爲歛之岑山渡人高祖量入公自歛遷揚祖文階公自揚遷淮之山陽兄復自淮遷于揚考夢州公

誥封奉政大夫妣蕭封宜人人生三子兄其孟也生而磊落明敏遇事敢決斷性激烈與人稍迕輒面赤氣直上目光如炬人遠巡畏却弗敢抗然其事父母則柔伏如嬰兒先母督子女尤嚴恒因事責兄笞以百計兄解衣受杖未嘗有怨色母患筋惕肉

瞶病夜不眠兄跪按以手母熟睡兄不敢起立也強于記問嘗讀左氏傳太史公書不三遍背誦一字不遺援筆作文日五六首無艱苦態先君子年四十五歲目失明兄身理家事外則賓友醕酢內則米鹽苛細皆井井有規畫先君子得以頤養從容兄之力也先君子在日調岑山貧無養者七十家寡婦保其節孤子延其祀先君子歿兄踵而行之二十年不倦嘗謂余曰吾性崛強不利仕宦家世業巖使遇知己相與調劑利弊亦足以小試矣然竟不克一日伸其志壬午仲冬余將北上補官自揚赴淮爲行計兄謂余曰吾素患氣逆疾子行毋預告我期使我悲悵余曰唯唯月之十四日余且行向夕同觀劇于友人家有演兄弟別者余與兄感觸歔歔舉坐爲之不快于時風雨橫集兄送至河干執手嗚咽不出一語而別余之在北也聞兄贊產



日耗乃以憂能傷人馳書相誠書未達而兄竟歿矣嗚呼痛哉  
兄生于康熙五十年七月二十七日歿于乾隆三十三年六月  
十一日享年五十有八由太學生以貴候選主事乾隆辛未丁  
丑兩遇

南巡特恩授中憲大夫

御書福字以

賜娶竹林汪公開鑒女子三淳澍濂皆太學生女一適歙縣吳  
尊士繼崔氏子一瀚銘曰

距兩先人塋兆凡六里魂魄往來兮凄其風雨後之人尚克數  
前人敦孝兮豐祀事其勿怠

室人蕭氏厝志

室人蕭氏廣陵人先母從兄女六世祖某前明鴻臚寺卿祖某郡庠生父某太學生以乾隆元年九月二日來歸十五年九月二日卒年三十有五生男二皆不育女一名順如余幼多疾性好讀書先母憐其文弱欲得明敏婦爲助擇配無慮數百家皆審顧不當意先是外祖母歿先母奔喪廣陵室人生甫四歲乳媪嘗抱持以見後有稱室人賢者遂告于先父爲余聘定焉婚日先母入房見新婦出執余手曰吾爲汝求婦審矣觀新婦狀貌乃不宜子年亦不過三十餘吾語汝矣然性謹厚汝善視之先母通文史于星相書悉究覽所論說往往奇中後五年母歿室人屢產致疾迄余就京兆試下第歸未至家而室人死矣嗚呼以吾母之神明料十數年後事如指掌室人歿距今又八年予潦倒坎壈益甚使吾母尚在憫惜宜何如也乃刻石于室人之厝塋以誌予悲塋地名窰溝在淮陰之西原厝以是年十二月二日志刻于二十三年八月十七日

予潦倒坎壈益甚使吾母尚在憫惜宜何如也乃刻石于室人之厝塋以誌予悲塋地名窰溝在淮陰之西原厝以是年十二月二日志刻于二十三年八月十七日

祭劉少司空文

嗚呼古人有言交視生死賓友多年卒爲師弟兩者兼之感恩知已臣質今亡心先奪矣公位卿貳貳子司空爲

皇子師經術是崇冰條一銜寒清可風以云仕宦亦旣遭逢公之行誼卓爾樹立汲才愛賢如恐弗及藻鏡輝輝智燈熠熠以儉以勤拯危匡急公之文章躡王蹈盧經史子集擷菁含腴海水山立天雲錦鋪鳴治隆盛爲時楷模公有令嗣或孝或才倚歟徽省邈矣蘭臺其季始冠蘭萬芽芽所歷完善非余所悲所可悲者公有嚴父勗公毋歸公且解組以病留茲言輒酸楚永夜歸魂猶依親所公屢衡文粵東皖徽玉剖太璞珠揚明輝絕足千里被之絡轡單門逸流到今感歎昔歲庚午欵曲始申公時初仕拂我于塵公大戊子余雌甲辰年旣差肩味若飲醇感余下第贈篇什二笥脯盈筵悽其別意雨合風離十年之際唯是相期文學行誼余躡鄉闈毛摧羽墮家屢折閱境尤煩脞適以萬計境無一可公聞盡傷手書招我行江北拜公于衙公曰毋苦酌酒看花教以聲律躋于風華食之衣之余且忘家乃俾獻賦以迓

《筮宴集卷六

六

雕輦公告于人如此其選余旣得官公懷斯遣左右挈提勤懇懇自茲歲月視聽眠食

天子之恩繫公拔識遂踵公來同居一宅角韻談經匪朝伊夕泊余移居無間往還覩公多病髮鬚斑斑漸憂家事恒少歡顏私心竊慮勸公投閒余滯江南聞公乞假愴然神驚病何如也執手春中公淚如瀉猶得經年低徊宇下嗚呼以公之賢嬰此痼疾若瘖若瘖神明頓失余菟余枯尚煩詎詰二十三年有如

一日正月穀旦公病益篤余近牀前矍然張目攬衣強坐挽余  
鬚哭死別從茲後會難續嗚呼傷哉搏搏者土寥寥者天疇不  
佑良不福于賢椒焚蕙燼辱亡齒寒余獨何心俯仰人間公方  
病時頻思南返戀

闕纏綿懷鄉悽惋丹旒素車行緣津阪寂爾一棺水遠天遠何  
地疇恩何時釋念行則余銘文則余槩豈曰能償沒齒猶歉公  
乎我哀于我乎監

平定縣志卷六

祖德以神律繫念於頃余哉文用余槩豈曰能償沒齒猶歉公  
乎我哀于我乎監

滿耳不識于潭潭焚蕙燼辱亡齒寒余獨何心俯仰人間公方  
病時頻思南返戀

祭同年比部方訥菴元配楊宜人文

嗚呼女適賢夫夫得賢婦閨門之內自相師友云何中道遽喪  
嘉耦旁觀爲悲况乎身受爰自來歸克諧孝思家故食貧所持  
書詩十指所出八口是資親則恬恬家則怡怡夜火熒熒明星  
作作手痠霜寒窗穿雪虐噓噓雞聲五更已迫毋敢稍怠米薪  
是托始有奇疾發狂囂呼夜不解帶晝不息跌視之勿懈唯掖  
唯扶饑食渴飲唯婦是須婦也神枯體亂弗息不能食食唯飲  
茗液遂患痰飲醫治弗釋姑則愈矣婦疾彌劇姑曰悲哉是蓋  
爲我我獨何心視彼疾蠹親串相傳孝聲以播疾伏至今時作  
時可訥菴成名宦在西曹京宦故貧衆口嗷嗷典衣先後計及  
緘毫治食早晚若經就縑二女二男中年賢匹一旦飄然永謝  
蘭室弱嗣何知尚索梨栗內政奚操如舟喪粹嗚呼傷哉夫子  
神傷邁此秋初月益以圓樹日以疏圓在露夕疏于雨餘塵積  
鏡掩風約帷虛嵇氏幼男謝家弱女父治外多疇能及汝何以  
恤之唯增酸楚呼而告焉寂無答語訥菴同歲爰有吾儕解之  
無術翻助傷懷敬奉椒酒醺之堂階休哉彤史卓矣荆釵嗚呼  
尚饗

毛氏妹哀辭

乾隆二十一年秋八月予應金陵試事竣移宿袁存齋太史隨  
園流連談讌未有歸志忽伯兄走一字抵予言毛氏妹病亟促  
歸視余卽別存齋倉皇渡江抵白沙家信再至而妹已死二日  
矣時八月廿四日也妹小余四歲在諸兄弟姊妹中爲最季其  
歿也纔三十五歲伯兄以事客邗上季弟感寒疾甚劇兄弟三  
人無一視含斂者可悲也妹幼時性下急先母嘗誡之曰若率  
是事舅姑必令我受人詈母歿妹尚在室余讀禮喪次或發聲  
號哭妹輒來共予哭予每舉經史中女子嘉言懿行相告語妹  
歎歎聽弗倦或聳動驚惕追念母言愈哭不能休如是者一年  
言動舉止淑慎異過舊時諸叔父叔母咸稱道以爲難比適毛  
氏十六年事夫子無違言其歿也舅姑哀之如喪已生戚姬皆

絕行堂真卷

主

悼惜可以知其婦道矣歿二三年時時見夢若矜余坎壈怒然  
以憂者豈予悲感紆結有動于中耶抑妹之靈終不泯也乃爲  
文哀之辭曰

繫余季妹秉淑德兮婞直寡容脩自克兮奉母教言成婦則兮  
歲時歸寧話朝夕兮家事縷縷在酒食兮念爾兄仲顛躓極兮  
恨愴而歸爾則歿兮二女熒熒戲幃側兮瞻顧淒悲血迸臆兮  
天道難知誤天謫兮含涕摛文弔靈魄兮

先君子古今體詩二十五卷既賴費歐餘觀察鄧嶠鈞太守吳  
蔗鄉大令三先生捐資刊就一時傳遍關中而古文未梓心歎  
然也已卯春韓城冀大令曉亭慨爲伙助又得咸陽吳大令蔗  
鄉佐資遂付剞劂翰既感且泣檢舊篋所藏古文六卷係甲子  
歲秋購諸白門書市中者較翁潭溪先生墓誌所稱古文十六  
卷已非全本每卷有嚴道甫先生鈐記豈秋帆中丞署中諸父  
執所選定耶抑道甫先生選訂藏本也仍求嶠鈞太守編定吳  
澗菴王雲門王葦村家韻篁四先生校刊而記其刻成之由以  
志感云男瀚謹識

08084

18083

